



## Akcija Damask: Hapšenje zbog ratovanja u Siriji

Službenici Državne agencije za istrage i zaštitu (SIPA) su u srijedu uvečer na Međunarodnom aerodromu Sarajevo, po naredbi Tužilaštva BiH, uhapsili M. K. (1986) iz Velike Kladuše nakon što je isporučen iz Turske.

Ova osoba lišena je slobode zbog postojanja osnovana sumnje da je počinila krivično djelo koje se odnosi na pripadanje terorističkoj grupi, odnosno terorizam, te protivzakonito formiranje i pridruživanje stranim paravojnim ili parapolicijskim formacijama. Sumnjiči se da je od novembra 2014. do juna 2015. boravila na sirijskom ratištu, gdje je učestvovala u oružanim sukobima na strani ISIL-a, saopćeno je iz SIPA.

Također, navedeno je da je prilikom rada na ovom predmetu ostvarena veoma dobra policijska saradnja na nacionalnom i međunarodnom nivou, koja je rezultirala isporučenjem navedene osobe iz Turske nakon što je tamo provela određeni period u pritvoru.

Osoba lišena slobode privedena je u službene prostorije SIPA, gdje se kriminalistički obrađuje, nakon čega će se, shodno uputama postupajućeg tužioca Tužilaštva BiH, odlučiti o njenom daljem statusu, naveli su iz SIPA.

